



## Publicaziuns dalla vischnaunca, jamna 51

### Administraziun communal

Sur las fiastas da **Nadal** e **Daniev** ei l'administraziun communal **serrada** il suandont temps:

**Nadal** naven da gievgia, ils 23 da december 2010 dallas 18.00  
entochen gliendisdis, ils 27 da december 2010 allas 8.30.

**Daniev** naven da gievgia, ils 30 da december 2010 dallas 18.00  
entochen gliendisdis, ils 3 da schaner 2011 allas 8.30.

Nus giavischein ina biala fiasta da Nadal ed in bien onn 2011!

*Administraziun communal Disentis/Mustér*

---

### Bien di, bien onn

Danovamein havein nus instradau e realisau entginas ovras da valur cuzzonta. Quei progress ei mo pusseivels grazia alla buna concordanza ed al bien agid da vischins e vischinas e da premurai collaboraturs e collaboraturas. Perquei vigurus sustegn admittel jeu ad in e scadin in profund Dieus paghi!

Bugen sperel jeu era vinavon cun quella buna entelgientscha. Jeu giavischel a tuttas convischinas e tuts convischins bialas e graziusas fiastas da Nadal e Daniev cun empau temps per reflexiun e recreaziun ed in legreivel e benediù 2011.

Cun cordials salids ed auguris  
*En num dalla suprastonza communal*  
*Dumeni Columberg, president communal*

---

### Reducziun individuala dallas premias dalla cassa da malsauns 2010

Persunas e famiglias che vivan en relaziuns economicas mudestas san, risguardond certas premias, dumandar contribuziuns vid las premias dall'assicuranza da basa obligatoria per la tgira da malsauns (LAM).

Persunas che han aunc buca fatg diever dil dretg san far quei **entochen la fin digl onn 2010** (davos termin, datum dil bul da posta 31-12-2010).

Informaziuns, basa legala, muossavia ed il formular d'annunzia anfleis Vus sin la pagina d'internet ([www.sva.gr.ch](http://www.sva.gr.ch)). Vus saveis era reterer ils formulars tier l'administraziun communal.

Per damondas stein nus bugen a Vossa disposiziun.  
*Administraziun communal*

---

### Deponer testaments e contracts d'ierta

En rama dalla nova procedura penala e civila svizra vegnan las vischnauncas incumbensadas naven dils **1-1-2011** cun la conservaziun officiala da testaments.



Persunas domiciliadas a Mustér san **naven d'immediat** deponer lur davosa voluntada (testaments, contracts d'ierta) tier l'administraziun communal e buca pli tier igl uffeci circuital Cadi. Ils testaments e contracts d'ierta ch'eran deponi tier igl uffeci circuital ein vegni surdai all'administraziun communal.

Per ulteriur sclariment stein nus bugen a disposiziun.  
*Administraziun communal*

---

### **Clom da quens**

Il quen communal vegn serraus giu cun ils 31 da december 2010. Per saver risguardar las expensas occurridas uonn el quen 2010 ei tut tgi che ha aunc da dar quen alla vischnaunca per igl onn current, supplicaus da far quei **entochen il pli tard mardis, ils 28 december 2010**.

Nus supplichein tuttas firmas sco era tut ils officials dalla vischnaunca d'observar quei termin.  
*Administraziun communal Disentis/Mustér*

---

### **Zona da mistregn Pignola Annunzia dall'interessenza**

Ils 19 da november 2010 ha la suprastonza publicau l'intenziun d'acquistar terren da baghegiar a Pignola e da procurar per l'avertura da quei territori, sinaquei che differentas fatschentas sappien realisar lur projects.

Interessents ein vegni envidai d'annunziar lur giavischs per ina surbaghegiada respectivamein per in dretg da baghegiar entochen ils 19 da december 2010. En quei interval han sis interpresas annunziar lur interess.

Aschinavon ch'ei vegn buca instradau in referendum per igl acquist da treis parcelas a Pignola, vegnan ils contracts da cumpra signai e la planisaziun da quartier cuntinuada. Sin fundament da quels conclus vegnan ils contracts per ils dretgs da baghegiar elaborai.

Bugen sperein nus che las interpresas interessadas realiseschien el decuors digl onn 2011 lur projects.  
*Suprastonza communal*

---

### **Ovra electrica Russein Invitaziun ad ina orientaziun**

El decuors dils davos dus onns han las suprastonzas communalas da Sumvitg e Mustér elaborau en concordanza cun la Axpo Hydro Surselva SA in project per ina engrondaziun dall'Ovra Russein e per ina nova concessiun.

Il cussegl da vischnaunca tracta quella impurtonta fatschenta **venderdis, ils 7 da schaner 2011** allas **20.15 en halla Cons**.

Il meinaproject, insch. Michael Bätcher, vegn a dar ina survesta detagliada dil project. A quella informaziun ei in e scadin cordialmein envidaus.

La votaziun all'urna per quei project ei previda per ils 13 da fevrer 2011.  
*Suprastonza communal*



## Controla da habitonts

### **Naschientscha**

Ferreira Figueiredo Mateus, naschius ils 6 da december 2010, fegl da Gomes Ferreira Elisabete Marina e Fernandes Figueiredo Mauricio David.

### **Mortori**

Barla Maria Simonet-Beeli, naschida ils 13-8-1934, morta ils 18-12-2010.

---

## Vischinadi Segnas

Cunquei che Segnas ei aunc il sulet liug en vischnaunca ordeifer la canzlia communal nua ch'ei sa vegnir votau per urna, ei vegniu la damonda dall'administraziun communal sch'il vischinadi da Segnas vegli aunc tener sidretg quella purschida. Suenter ina viva discussiun ha la radunonza generala dils 10-12-2010 dau suatientscha alla damonda dalla vischnaunca da buca pli postar in'urna ils dis d'elecziun avon baselgia.

La suprastonza dil vischinadi stat denton a disposiziun als vischins da Segnas che drovan sclariment per votar cun posta.

S'annunziar saveis tier Edgar Durschei, 081 936 43 09, ni Armin Berther, 079 609 48 25.

*La suprastonza*

---

## Pro Senectute

### **Cuors trenament dalla memoria a Mustér**

In viadi d'exploraziun tras il tgau – trenar il tschurvi a moda raschuneivla. Scuvri Vossas capacitads spirtalas grazia ad in trenament dalla memoria. Il tschurvi sesvilupescha e semida duront l'entira veta. Ins sa pia emprender novas caussas tochen en in'aulta vegliadetgna.

Senza sforz e cun humor intervegnis Vus co Vus saveis mantener il spért activs e movibels. Cun agid d'ina recepziun pli cunscienta e d'ina strategia da management raschuneivla emprendis Vus cun temas interessants co nezegiar pli efficientamein Vossas capacitads e co applicar quellas metodos el mintgadi.

**Liug:** Mustér, nua vegn aunc communicau

**Datas:** 4 x mesjamna, naven dils 10 da schaner 2011

**Temps:** 13.30–15.45

**Menadra dil cuors:** Monika Berther-Sommer, trenadra dalla memoria certificada SVGT

Annunzias ed informaziuns: **tochen ils 3 da schaner 2011 tier la Pro Senectute Grischun**, Alexanderstrasse 2, 7000 Cuera, tel. 0844 850 844 (tariffa locala).

Il vast program dallas differentas purschidas da cuors e formaziun dalla Pro Senectute per personas pesinadas san ins retrer tiel post regional dalla Pro Senectute Surselva a Glion sut la numera da telefon 081 925 43 26.

---

## Societad da musica Mustér

### **Concert da Daniev**

Dumengia, ils **2 da schaner 2011 allas 20.00 en baselgia parochiala S. Gions a Mustér**. Silsuenter stiva da caffè en halla Cons.

Entrada libra, collecta.



### Pendicularas Mustér 3000

Naven dils 10 tochen ils 30 da schaner 2011 envidan las Pendicularas Mustér 3000 tut las senioras ed ils seniors dad ir gratuitamein cun la pendiculara si Gaischavedra ed anavos.

---

### Uniun da dunnas

Tura cun calzera da neiv (gianellas)

**Datum:** Dumengia, ils 9 da schaner 2011

**Menadra:** Durschei Marta

**Partenza:** denter las 8.00 e las 9.00 tenor aura e ruta

S'annunziar tochen ils 5 da schaner tier Marta Durschei, e-mail: [mdurschei@gmx.ch](mailto:mdurschei@gmx.ch), tel. 081 947 48 08.

---

### Ludoteca Mustér

Liug/Ort: Halla Cons, tel. 076 494 39 92

e-mail: [ludoteca@disentis.ch](mailto:ludoteca@disentis.ch)

*Uras d'avertura / Öffnungszeiten:*

Gliendisdis/Montag: 18.30–20.00

Gievgia/Donnerstag: 16.00–17.30

Venderdis/Freitag: 18.30–20.00

### Attenziun

Duront las vacanzas da Nadal resta la ludoteca **serrada naven da venderdis, ils 24 da december entochen e cun la gievgia, ils 6 da schaner**. Duront quei temps vegn tarmess neginas admoniziuns.

Bien engraziament per Vossa capientscha.

Il calender d'advent sesanfla uonn enamiez il vitg. Fagei stem dallas bialas figniastras e decoraziuns creadas cun grond engaschi ed immensa fantasia. Nus engraziein a tuts/tuttas participants/participontas per la buna collaboraziun.

Bialas fiastas e tut bien pigl onn niev.

*La squadra dalla ludoteca*

---

### Biblioteca populara Mustér

Liug: Casa da scola, tel. 081 947 52 90, [biblioteca@disentis.ch](mailto:biblioteca@disentis.ch)

Sut [www.disentis.ch](http://www.disentis.ch) ni [www.bibliotecas-surselva.ch](http://www.bibliotecas-surselva.ch) anfleis Vus nies entir catalog bibliotecar.

Per e-mail saveis Vus reservar ina ni pliras medias ed enteifer 5 dis retrer ad emprest ellas en biblioteca populara.

*La biblioteca ei aviarta:*

Gliendisdis 18.30–20.00 uras

Mardis 13.30–15.00 uras

Gievgia 16.00–17.30 uras

Venderdis 18.30–20.00 uras



Nies motto: Leger . . . tedlar . . . mirar . . . !  
Nus selegrein da mintga viseta.

*Biblioteca populara Mustér*

*Nus giavischein a nos clients ed all'entira populaziun bialas fiastas da Nadal ed in ventireivel niev onn. Cordial engraziament per Vossa fideivladad e Vies interess. Nus selegrein gia, d'astgar cussegljar Vos era egl onn niev.*

*Il team dalla biblioteca populara Mustér*